

Uunga siunnersuut:**Qimmeqarneq qitsuuteqarnerlu pillugit Inatsisartut inatsisaat****Kapitali 1***Atuuffia*

§ 1. Inatsisartut inatsisaanni qimmeqarneq qitsuuteqarnerlu sunaluunniit pineqarpoq, taakku inuussutissarsiutaagaluarpata inuussutissarsiutaanngikkaluarpataluunniit apeqqutaatinnagu.

Imm. 2. Inatsimmi qimmiuteqarneq pillugu aalajangersakkat Kalaallit Nunaanni qimminik qimuttoqarfiusumi atuutinngillat, kalaallit qimmii qimuttut pillugit qimmeqarneq illersuinerlu pillugit Inatsisartut inatsisaanni § 2-mi, nr. 1 naapertorlugu, tassani kalaallit qimmii qimuttut kisimik akuerisaapput, kalaallit qimmii qimuttut pillugit qimmeqarneq illersuinerlu pillugit Inatsisartut inatsisaanni § 2-mi, nr. 2 naapertorlugu.

Kapitali 2*Qimmiuteqarneq aamma qitsuuteqarneq*

§ 2. Qimmiuteqarniaraanni aamma qitsuuteqarniaraanni imaluunniit taakkuninnga Kalaallit Nunaannut eqqussiniaraanni piumasqaataavoq:

- 1) imm. 2 naapertorlugu akuersissut,
- 2) ataasiakkaat, atajuartussanik ID-mik nalunaaqutserlugit, tak. § 14, imm. 1,
- 3) aneertillutik qungasequteqartinneqassapput, tak. § 3-mi imm. 3, aamma
- 4) akiuussutissiineq, tak. § 13, imm. 2.

Imm. 2. Qimmeqarnissamik qitsuuteqarnissamillu akuersissummut qinnuteqaat kommunimut najugarisamut imaluunniit kommunimut nuuffigisamut nassiunneqassaaq.

Imm. 3. Meeqqat 18 inorlugit ukiullit taamaallaat qimmeqarlutillu qitsuuteqarsinnaapput angajoqqaatik angajoqqaatulluunniit nakkutiginnittutik nakkutilliisoralugit akisussaasoralugillu.

Imm. 4. Qimminik qitsunnillu Kalaallit Nunaannut eqqussinermi taakkununnga malittarisassat qaqugukkulluunniit atuuttut malillugit pissapput.

§ 3. Kommunalbestyrelsi aalajangiisinnaavoq kommunip ilaani qimmeqaqqusaassanngitsoq imaluunniit qitsuuteqaqqusaassanngitsoq, imaluunniit qimmilluunniit sorliunissaanik, taassuma piaqqiortinnissaanik immikkut piumasqaateqarsinnaalluni, imaluunniit qimmip kommunimut eqqutinnginnerani pigilinnginneraniluunniit piaqqiorsinnaajunnaarsinnissaanik piumasqaarsinnaalluni.

Imm. 2. Qimmit qitsuulluunniit piginnittaasa avatangiisaannut akornusersuisassanngillat. Qimmip qitsuulluunniit eqqaamiut eqqissiviilliortippagit qiluttuarluni miaggoortuarluniluunniit allatulluunniit akornusersuisumik pissusilersortuarpat

kommunalbestyrelsimut naammagittaalliutigineqarsinnaapput, taakkulu piginnittoq peqqusinnaavaat akornusersuisumik pissusilersorneq unitseqqullugu.

Imm. 3. Qimmit illut akornanni pituutaqartinneqassapput. Nigavillugit qungasequtit, qungasequtit innaallagissamoortut qungasequtilluunniit allat qimmimut qitsummulluunniit anniaataasinnaasut iluaalliortitsisinnaasulluunniit inerteqqutaapput.

Imm. 4. Imm. 3-mi oqaaseqatigiinni siullerni aalajangersakkanut ilaatinneqanngillat savaatillit qimmii, atorfirmut atatillugu qimmit naalackersugaasut kiisalu qimmit illoqarfiup avataani aallaaniarnermut suliffiulluunniit avataatigut sammisaqarnernut atorneqartut aamma naalackersugaasut.

Imm. 5. Qitsuit aneersinnaapput piginnittuata tamanna kissaatigippagu, taamaattoq takukkit imm. 1, aamma § 2-mi, imm. 1-imi, nr. 3 aamma § 12.

§ 4. Qimmit qitsuilluunniit ataatsimoorteqqusaanngillat sumiiffinni qimminut qitsunnullu avatangiisinulluunniit peqqissutsikkut aarlerinartorsiortitsisinnaasuni imaluunniit uumasunut taakkununga naleqqutinngitsunut sumiiffinnut ataatsimoorteqqusaanngillat.

Imm. 2. Sumiiffiit qimmit qitsuillu katersorneqarfigisartagaat pillugit maleruagassanik immikkut ittunik Naalackersuisut aalajangersaasinnaapput.

§ 5. Qimminik qitsunnullu kommunip iluani imaluunniit kommunimut allamut nuussinermi piginnittup kommuni nuuffigisani qimatani lu tamatuminnga nalunaarfigissavai. Tamanna nuussinnginnermi kingusinnerpaamik ullunik 14-inik sioqqutsilluni nalunaarutigissavaa.

Imm. 2. Nalunaaruteqarnermi ilaatinneqassapput qimmit qitsuillu amerlassusaat, qanga akiuussutissamik kapitissimanersut kiisalu ID-mik nalunaaqutserneqarneranni normui.

Imm. 3. Imm. 1 aamma 2 malillugu paasissutissat nunatsinni uumasunik paasissutissaasivimmut kommunimit nalunaarutigineqassapput, tak. § 14, stk. 1.

Imm. 4. Qimmit qitsuillu ID-mik nalunaaqutserneqarsimanngippata akiussuserneqarsimanngippataluunniit imaluunniit nappaatinik siaruarerinissamut nappaateqartoqalernissaanilluunniit aarlerinaateqarpata kommunalbestyrelsit nuussinissaq inerteqqutigisinnaavaat.

Kapitali 3

Qimmit kiisortut aamma qimmit paatinneqartartut nukittuullu inerteqqutaapput

§ 6. Kiisortunik qimmeqarnissaq inerteqqutaavoq. Qimmit kiisortut tassaatinneqarput qimmit navianartumik pissusissamisuumngitsumik pissusillit imaluunniit naatsorsorneqarsinnaanngitsumik pissuseqartutut isigineqartut. Qimmip kiisortuusutut nalilerniarneqarnerani kommunalbestyrelsip Uumasullu nakorsaaneqarfiata isumasioqatigiillutik nalilersussavaat. Qimmeq kiisortutut nalilerneqarpat toqunneqassaaq.

Imm. 2. Qimmeq qimmimik allamik, uumasumik allamik inummilluunniit ajoqusiisumik kiisisimasoq toqunneqassaaq. Ajoqusiisumik kiisisimanernut tunngasuni sulianik naliliiniarnermi kommunalbestyrelsip Uumasunullu oqartussaqaarfiup akornanni isumasioqatigiittoqassaaq.

Imm. 3. Imm. 1 aamma 2 malillugu Uumasunut Oqartussaarfik inaarutaasumik aalajangiisaaq.

Imm. 4. Imm. 1 imaluunniit 2 malillugu piginnittoq akunnerit 24-t iluanni toqutsisimangippat piginnittumut akiligassanngorlugu piginnittumullu taarsiinertaqanngitsumik kommunalbestyrelsi qimmip toqunneqarnissaa pillugu piaartumik sulissuteqassaaq.

§ 7. Qimminik paatinneqartartut nukittuutullu isigineqartunik makkuninnga piginnineq, eqqussineq piaqqiortitsinerlu inertequtaavoq:

- 1) Pitbull terrier.
- 2) Tosa inu.
- 3) Amerikarmiut staffordshire terrieriat.
- 4) Fila brasileiro.
- 5) Dogo argentino.
- 6) Amerikarmiut bulldogiat.
- 7) Boerboel.
- 8) Kangal.
- 9) Aasiap qiterpasissuanit ovtcharka.
- 10) Kaukasiamit ovtcharka.
- 11) Ruslandip kujataanit ovtcharka.
- 12) Tornjak.
- 13) Sarplaninac.

Imm. 2. Imm. 1-imi inerteqqut aamma atuuppoq qimminut qimminut qulaani taaneqartunit akuneqarsimasunut.

Imm. 3. Tamanna pisariaqartoq nalilerneqarpat inerteqquteqarnermi qimmit allat ilaaterlugit Naalakkersuisut aalajangersaasinnaapput.

§ 8. Qimmit § 7-imi, imm. 1-imi, aamma imm. 2-mi unioqqutitsilluni pigineqartut, eqqunneqarsimasut piaqqiortinneqarsimasulluunniit qimmimik piginnittumut taarsiissuteqarfiunngitsumik aamma piginnittumit akilerneqartussanngorlugu Uumasunut oqartussaarfip suliniuteqarneratigut toqunneqartassapput.

Imm. 2. Qimmeq qimminut § 7-imi, imm. 1-imi imaluunniit imm. 2-mi ilaatinneqartunut ilaanersoq taakkuninngaluunniit akusaanersoq nalornissutigineqarpat piginnittup qimmip qimmeqatigiinnit sorlerneersuuneranik suuneranilluunniit uppersaanissaa kommunalbestyrelsip piumasarisinnaavaa.

Imm. 3. Piffissami qimmip suminngaanneernerata aalajangernissaata tungaanut Uumasunut Oqartussaarfik qimmip allanit immikkoortinnissaanut pisinnaatitaavoq. Qimmit allat avataannut tikkineqarsinnaajunnaarlugit inissiineq aamma tassaasinnaavoq akuutissat atorlugit kinguaassioortitsisinnaajunnaarneq allatulluunniit pisariaqartunik iliuuseqarneq qimminik akuukkanik piaqqiorneq pinaveersaartinniarlugit.

Imm. 4. Qimmip suminngaanneerana uppersarneqarsinnaanngippat, kommunalbestyrelsimik isumasioqatigiinnerup kingorna Uumasunut Oqartussaarfik

inaarutaasumik aalajangiissaaq qimmeq § 7-imi, imm. 1-imi taaneqartunut ilaanersoq, tak. § 7-imi, imm. 2. Uumasunut Oqartussaqaarfiup aalajangerpagu, qimmeq § 7-imi, imm. 1-imi imaluunniit imm. 2-mi pineqartunut ilaasoq, qimmeq toqunneqassaaq.

Imm. 5. Arsaarinnissuteqarallarnermut atatillugu aningaasartuutaajunnartut piginnittumit akilerneqassapput.

Imm. 6. Piffissaalersimappat uppernarsaanissaq kommunalbestyrelsimit piumasarineqalerluni tigumminnittoq piginnittorlu assigiinngippata Uumasunut oqartussaqaarfimmik isumasioqatigiinnerup kingorna pisut apeqqutaatillugit qimmip qimminut § 7-imi ilaatinneqartunut ilaannginneranik taakkuninngaluunniit akusaannginneranik piginnittup naammattumik uppernarsaasiinissaanut kommunalbestyrelsi naapertuuttumik piffissaliissaaq.

Imm. 7. Piginnittoq kommunalbestyrelsip piffissaliussaata iluani qimmip qimminut § 7-imi ilaatinneqartunut ilaannginneranik taakkuninngaluunniit akusaannginneranik naammattumik uppernarsaasiinnaasimanngippat qimmeq inerteqqummut ilaasutut isigineqassaaq.

§ 9. Inuit 1. januar 2012 qimminik § 7, imm. 1-imi taaneqartunik taakkuninngaluunniit akusanik pigisaqartut qimmiutertik tigummiinnarsinnaavaat.

Piomasqaatit makkua malinneqassapput:

- 1) Qimmit pineqartut allanut tunniunneqaqqusaanngillat.
- 2) Qimmit takinerpaamik pituutaqartinneqassapput. 2 meterinik ersaquserlugit tamanit tikinneqarsinnaasuniikkaangamik.

Kapitali 4

Qimmeqarneq qitsuuteqarnerlu pillugit ileqqoreqqusanik atortuulersitsineq

§ 10. Kommunimi qimmeqarnermut qitsuuteqarnermullu akuersissutit pillugit kommunalbestyrelsit ileqqoreqqusaliussapput.

Imm. 2. Imm. 1-imi ileqqoreqqusat taaneqartut maleruaqqusanik makkuninnga imaqaassapput:

- 1) Taaneqassaaq,
 - a) nunap immikkoortuanni nassuiarneqartumi qimmeqarneq qitsuuteqarnerluunniit inerteqqutaanersoq, matumanilu kommunit angallataataanni,
 - b) qimmeqarnermut qitsuuteqarnermullu akuersissut qanoq pissarsiarineqartarnersoq,
 - c) akuersissut inummut tunngatitaanersoq, imaluunniit allanut tunniunneqarsinnaanersoq, aamma
 - d) kommunalbestyrelsi innuttaasunik annertuumik qasseeriarlutilluunniit maleruaqqusanik unioqqutitsisartunik itigartitsinissaminnut imminut periarfissaqartinnersoq.
- 2) Qimmit qitsuillu ID-mik ilisarnaaserlugit, nalunaarsorlugit akiuussuserlugillu kommunip suleriaasaanik nassuiaanikkut, matumanilu uumasut silami angalaaraangamik paasissutissat suut qungasequtaanni allassimassanersut.
- 3) Qulaani piomasqaatinik unioqqutitsinermi kommunip pisinnaasaanut tunngasunik aalajangersakkat.

- 4) Qimmit qitsuillu inuttaqanngitsut unioqquitsinikkullu eqqussat pigineqartut pillugit aalajangersakkat kiisalu inuttassarsiuussinermut tigusiarnermullu aalajangersakkat.
- 5) Kommunimi qimminik qitsunnillu akisussaasumik toqqaanermut aalajangersakkat, ass. qimminik nakkutilliisoq. Aalajangersakkatigut pineqartup piginnaatitaaffii pisinnaatitaaffiilu pillugit erseqqissarneqassapput.
- 6) Qimminik qitsunnillu akiuussusersuisussamik taassumallu pisinnaasassaamik akisussaasumik toqqaaniarnermut aalajangersakkat.
- 7) Qimminik qitsunnillu piaqqiortitsinermut aalajangersakkat, matumanilu uumasut kommunimut eqqunneranni piaqqiorsinnaajunnaarsimanissaannut tunngasut.
- 8) Qimmeqarnermut qitsuuteqarnermullu atatillugu akornutinut tunngatillugu naammagittaalliuutit qanoq suliarineqartassanersut pillugu aalajangersakkat, matumanilu uumasunik arsaarinnissutaagallartunik immikkoortitaagallartunilluunniit inissiivissaannut tunngasut ilanngullugit eqqarsaatigalugit.
- 9) Ajunaarnersuaqartillugu qimmit qitsuillu qimarngunnissaannut upalungaarsimanernut tunngasunik aalajangersakkat.

Imm. 3. Kommunalbestyrelsi najukkami atukkat aallaavigalugit pissutsinut allanut tunngasunik aamma aalajangersaasinnaavoq aalajangersakkat taama ittut Inatsisartut inatsisaannut tassanngaluunniit aalajangersakkanut akerliunngippata.

Kapitali 5

Qimmit qitsuillu paarineqarnerat

§ 11. Kialluunniit qimmillip qitsuutillillu taakku peqqissaartumik paarineqarnissaat, taamatutaaq nerukkarneqartarnissaat isumagissavaa, kiisalu imertinneqartarnissaat aamma timimikkut, pissusilersormikkut peqqinnissamik kullu pisariaqartitaat eqqarsaatigalugit periaatsit akuerisaasut aamma ilisimatuussutsikkut misilittakkat naapertorlugit paarineqarnissaat uumasut illersornissaat pillugu Inatsisartut inatsisaat malillugu isumagissavai.

Imm. 2. Qimmit qitsuillu qaqugukkulluunniit inuussutissanut pisariaqartitaat naapertorlugit nerukkarneqartuaannassapput minguitsumillu imeqartinneqarlutik.

Imm. 3. Qitsuit silamiitinneqartuaannassanngillat piginnittulli inaanut isersinnaassallutik.

Imm. 4. Qimmit qitsuillu pitussimaneqartuaannassanngillat ungaluniitittuaannartinneqassanatilluunniit.

Imm. 5. Qimmeq pitoqqaguni minnerpaamik meterinik tallimanik pituutaqartinneqassaaq, taavalu sialummut, apummut, anorimut nillimullu oqquiffissaqassalluni. Qangatsiffissaq qimmip inigippagu ima portutigissaq qimmeq nikorfasinnaassalluni akornutitaqanngitsumillu innakarsinnaassalluni.

Imm. 6. Qimmit piaraat arnaminiitinneqassapput ikinnerpaamik sapaatit akunnerinik 8-nik utoqqaassuseqalernissaata tungaannut, arnaa toqusimanngippat, arnaallu toqusimappat qimmiaqqat sapaatit akunneri 6-t inorlugit utoqqaassuseqarpata toqunneqassapput.

Imm. 7. Qitsuit piaraat arnaminiitinneqassapput ikinnerpaamik sapaatit akunnerinik 12-nik utoqqaassuseqalernissaasa tungaannut, arnaa toqusimangippat, arnaallu toqusimappat piaqqat sapaatit akunneri 10-t inorlugit utoqqaassuseqarpata toqunneqassapput.

§ 12. Qimmit qitsuillu uumatillugit nuunnermi aallarnermiluunniit naammattumik nakkutilliisoqartinnagit qimaannarneqarnissaat inerteqqutaavoq.

Imm. 2. Qimmit qitsuillu qimaasimasut angalaannartullu piginnittup piaartumik tigunissai isumagissavai.

Imm. 3. Qimmit qitsuillu pituussaarsimasut kommunalbestyrelsinit tiguneqartut minnerpaamik akunnerni 72-ini inuttassarsiuunneqassapput. Piginnittoq akunnerni 72-ini nalunaarsimangippat kommunalbestyrelsip uumasut Uumasunut oqartussaqaarfik isumasioreerlugu allamut pigisussanngorlugit nalunaarsorsinnaavaat imaluunniit piginnittup akiligassaaniq piginnittumullu taarsiinertaqanngitsumik toqutsissinnaavaat.

Imm. 4. Qimmip qitsuilluunniit inuttassarsiuunnerani tiguniarneqarneranut, tiguneqarnerani nerisaqartinneranut uninngatinneranullu aningaasartuutaasut piginnittumut kommunalbestyrelsit akiligassanngortissinnaavaat.

Imm. 5. Imm. 4 naapertorlugu aningaasartuutit akilerneqarnissaata tungaannut kommunalbestyrelsit uumasooq tiggummigallarsinnaavaat.

Imm. 6. Imm. 4 naapertorlugu aningaasartuutaasut piginnittup akilerusunngippagit uumasooq piginnittumut akiligassanngorlugu piginnittumullu taarsiissutitaqanngitsumik. kommunalbestyrelsit toqutsissinnaavaat allamulluunniit nalunaarsorlugu tunniussinnaavaat.

Imm. 7. Naalackersuisut tigusiniarneq inuttassarsiuussinerlu pillugit ersarinnerusunik malittarisassiorsinnaapput.

§ 13. Qimmiminik qitsuumminilluunniit toqutsiniartup sapinngisamik sukkasuumik anniartitsinertaqanngitsumillu toqunneqarnissaat qularnaassavaa.

Imm. 2. Imaani imermiluunniit ipititsinikkut, qimitsinikkut nivinngaanikkulluunniit toqutsineq inerteqqutaavoq.

Imm. 3. Naalackersuisut qimminik qitsunnillu toqutsineq pillugu malittarisassiorsinnaapput.

Kapitali 6

ID-mik nalunaaqutsiinerit, akiuussusersuinerit nalunaarsuinerillu

§ 14. Qimmit qitsuillu tamarmik kingusinnerpaamik 4-nik qaammatillit nunatsinni uumasunut paasissutissaasivimmi nalunaarsorsimassapput uumasullu immikkut atajuartussamillu ID-mik nalunaaqutserneqarsimassallutik.

Imm. 2. Qimmimik qitsummullu piginnittup Uumasunut oqartussaqaarfiup akiuussusersuinissamik pilersaarutaaniq malinnissaaq atajuartussamik immikkut nalunaaqutserlugu nalunaarsussavaa akiuussusinnginnerani imaluunniit siullermik akiuussusernerani:

1) Qimmit akuttunngitsumik qimmit nappaataannut, parvovirusimut perlerornermullu akiuussuserneqartassapput.

2) Qitsuit akuttunngitsumik perlerornermut akiuussuserneqartassapput. Piginnittoq qimmiutimi qitsuutimilu allannguutaanit tamanit kommunimut nalunaaruteqassaaq.

Imm. 3. Imm. 2 malillugu akiuussusersuinerit taamaallaat uumasut nakorsaannit, Uumasunut oqartussaqaarfimmit akuerisaasumit qimminut akiuussusersuisartumit imaluunniit qimminik nakkutilliisumit suliarineqarsinnaapput. Imm. 1 malillugu ID-mik nalunaaqutsersuinerit uumasut nakorsaattut ilinniarsimasumit imaluunniit Uumasunut oqartussaqaarfimmit akuerisaasumit qimminik nakkutilliisumit taamaallaat suliarineqarsinnaapput. Akiuussutissaliinermut nalunaaqutsiinermullu aningaasartuutit piginnittup akilissavai. Taamaattoq Nunatta karsiata savaatillit qimmiinik akiuussusersuineq akilissavai, soorluttaaq savaatillit sulinerminni namminneq qimmitik akiuussusersorniarlugit Uumasunut nakorsaaneqarfik immikkut akuersinissamik qinnuteqarfigisinnaagaat.

Imm. 4. Kommunalbestyrelsip nakkutigissavaa qimminut akiuussutissanik Uumasunut oqartussaqaarfimmit akuerisaallutik kapuisinnaasut uumasulluunniit nakorsaattut qimminilluunniit nakkutilliisut pisariaqartitat naapertorlugit amerlassuseqartussat kommunimi atorfinitsinnissaat.

Imm. 5. Kommunalbestyrelsip inassuteqaateqarnera malillugu kommunini qimminut akiuussutissanik kapuisartussat akuerisaasut Uumasunut oqartussaqaarfiup ilinniartillugillu piginnaatissavaat. Tamanna aamma kommunini qimminik nakkutilliisunut atuuppoq.

Imm. 6. Qimmit qitsuillu akiuussuserneqarsimasut ID-millu nalunaaqutserneqarsimasut pillugit uumasunut paasissutissanik katersivimmuut kommunalbestyrelsi nalunaarummik nassiussissaaq akiuussuseereernermit imaluunniit ID-mik nalunaaqutseereernermit kingorna kingusinnerpaamik qaammat 1 qaangiutsinnagu kiisalu qimmit qitsuillu tamarmik ID-mik nalunaaqutsersimanissaat akiuussusersuinissamullu pilersaarut naapertorlugu akiuussusersimanissaat nakkutigissallugu.

Imm. 7. Qimminik qitsunnillu Uumasunut oqartussaqaarfik nakkutilliinermik aallartitsisinnaavoq qimmit qitsuillu nappaateqartutut ersiuteqarpata imaluunniit arlaannik peqqiilliuuteqarpata. Uumasunut oqartussaqaarfik nakkutiginninnernut atatillugu misiligutissanik tigooqqaallunilu katersisinnaavoq, kiisalu immikkut nalunaaqutsersuilluni nalunaarsuillunilu uumasunik nakorsaannermik periaatsinik allanik suliaqarsinnaalluni. Aalajangersakkami allaaserineqarsimasut malillugit pisuni pisariaqartitsiffiusuni piginnittoq Uumasunut oqartussaqaarfimmut akeqanngitsumik ikiutissaaq.

Imm. 8. Imm. 6 naapertorlugu nalunaarutiginninnerit pillugit Naalakkersuisut malittarisassiorsinnaapput, matumani ilaatigut kommunalbestyrelsit paasissutissat suut nalunaarutigissaneraat kiisalu qanoq akulikitsigisumik nalunaaruteqartoqartarnersoq ilanngullugu.

§ 15. Qimmimik qitsummilluunniit piginnittoq akiuussutissamik kapuinissamut imaluunniit ID-mik nalunaaqutsiinissamut, atajuartussamik nalunaaqutsiinissamut aamma nalunaarsorneqarnissamut akerliuppat, kommunalbestyrelsip suliniutigissavaa, piginnittumut akiligassanngorlugu

uumasoq pinngitsaaliilluni akiuussutissanik kapineqassasoq, nalunaaqutserneqassasoq aammalu nalunaarsorneqassasoq.

Imm. 2 Imm. 1 malillugu pinngitsaaliissummik akiuussutissanik kapuisoqarsinnaanngippat, nalunaaqutsersuisoqarsinnaanngippat kiisalu nalunaarsuisoqarsinnaanngippat, kommunalbestyrelsip suliniutigissavaa, uumasooq piginnittumut nutaamut nalunaarsorneqassasoq imaluunniit piginnittup akiligaanik aamma taarsiinertaqanngitsumik uumasup toqunneqarnissaa.

Kapitali 7

Qimminik qitsunnillu assartuineq

§ 16. Qimminik qitsunnillu assartuineq illersorneqarsinnaasumik aamma uumasut isikkui, peqqissusaat tarnikkullu pisariaqartitaat isiginiarlugit ingerlanneqartassaaq. Uumasup angallannerani tamarmi uumasumut akisussaasup piginnittuata ingerlaqatigissavaa.

Imm. 2. Nalunaaquttap akunnerinik 4-nik sivilisunerusumik angalasoqassatillugu uumasut imermik imersinnaassapput.

Imm. 3. Qimmit qitsuillu angallanneqarneri, aamma tamatuma uppersaatitaqartinneqarnissaa pillugu Naalackersuisut malittarisassiorsinnaapput.

Kapitali 8

Qimminut qitsunnullu sungiusaasivinnik, napparsimmavinnik il.il. ingerlatsineq

§ 17. Uumasunut oqartussa qarfiup akuersissuteqareerneratigut aatsaat qimminut aamma qitsunnut ineqarfiannik, sungiusaavinnik, angerlarsimasitsisarfinnik assigisaannillu pilersitsisoqarluni ingerlatsisoqarsinnaavoq.

Imm. 2. Akuersissummut atugassarititaasut aamma atuisunit akilerneqartumit nakkutilliineq pillugit malittarisassanik Naalackersuisut aalajangersaasinnaapput.

Imm. 3. Sungiusaavinnik ingerlatsineq, piaqqiortitsineq, allisaaneq, nipitartitsineq kiisalu piaqqanik paarsineq arnavissanillu ilummisunik paarsineq aamma paaqqutarinnineq pillugit malittarisassanik ersarinnerusunik Naalackersuisut aalajangersaasinnaapput.

§ 18. Uumasunut oqartussa qarfiup akuersissuteqareerneratigut aatsaat qimminut aamma qitsunnut napparsimmaviit aamma uumasunut nakorsiartarfiit pilersinneqarlutik ingerlanneqarsinnaapput.

Imm. 2. Akuersissut aamma atuisunit akilerneqartumit nakkutilliineq pillugit malittarisassanik ersarinnerusunik Naalackersuisut aalajangersaasinnaapput.

Kapitali 9

Qimmit qitsuillu nioqputigineqartarnerat il.il.

§ 19. Qimmit piaraat sapaatit akunnerinik 8-nik utoqqaassuseqartinnatik, aamma qitsuit piaraat sapaatit akunnerinik 12-nik utoqqaassuseqartinnatik tuneqqusaanngillat imaluunniit

allamut tunniunneqarlutik, aatsaat arnaat ilanngullugu tuniniarneqarpat imaluunniit allamut tunniunneqarpat, tak. § 11-mi, imm. 6 aamma 7.

§ 20. Qimminik qitsunnillu niuerneq pillugu Naalakkersuisut ersarinnerusunik malittarisassiorsinnaapput, matumani ilaallutik pisinermi tunisinermilu nalunaaruteqarneq nalunaarutiginninnerlu, peqqissusaannut tunngasunut piumasaqaatit, misissuinerit, passussinerit, assartuinerit, uninngatinneqarneri assigisaannullu tunngasut.

§ 21. Inuit, ingerlatseqatigiiffiit, peqatigiiffiit il.il. inuussutissarsiutigalugu inuussutissarsiutiginnaguluunniit qimmeerniartut qitsuerniartullu tuniniaanerminnik oqartussaasunut nalunaarutiginninnissaat, kiisalu pisiaminnik tunisaminnillu nalunaarutiginninnissaat pillugu Naalakkersuisut malittarisassiorsinnaapput.

Kapitali 10

Nakkutilliineq, unnerluutiginninneq aamma uparuaaneq

§ 22. Inatsisartut inatsisaanni matumani aalajangersakkat malinneqarnerisut Naalakkersuisut nakkutigissavaat.

§ 23. Kommunalbestyrelsi Inatsisartut inatsisaanni matumani §§ 2-12, § 13, imm. 1, imm. 4 aamma imm. 6, §§ 14-15, § 18. §§ 24-26-mik nakkutiginnissaaq, taavalu piumasaqaatinik §§ 3-8, § 9, imm. 1, § 10-12, § 14, imm. 1-2, § 15, § 18, § 25-mi aalajangersarneqarsimasunik eqquutsitsinissamut qulakkeerinninnissaaq pisariaqartinneqarpat inerteqqutinik aamma peqqussutinik nalunaaruteqarluni.

Imm. 2. Inatsisartut inatsisaanni matumani § 6, imm. 1 aamma 2, § 8, imm. 4, § 12, imm. 3 aamma 26, imm. 2 naapertorlugit suliani ersarilluinnartumik allassimavoq, kommunalbestyrelsi Uumasunut oqartussaqaarfimmut saaffiginnissasoq, kiisalu uumasulerinermi pissutsit pillugit imaluunniit inatsit malillugu oqartussaasutut akisussaaffik pillugu nalornissuteqartilluni.

Imm. 3. Kommunalbestyrelsi Uumasunut oqartussaqaarfimmut nalunaaruteqassaaq, pissutsinik oqartussaqaarfiup taassuma iliuuseqarfigisariaqagaanik maluginiagaqaruni.

§ 24. Uumasunut oqartussaqaarfik suliani uumasunik illersuiniarnikkut aamma uumasunik ilinniagaqarsimanertigut pisariaqartitsiffiusuni pingaarnertut nakkutilliisuvoq.

Imm. 2. Uumasunut oqartussaqaarfik nammineq najuussinnaatinngagu, oqartussaqaarfiup aalajangigaanik suliaqarnissaminut kommunalbestyrelsi pisussaaffeqarpoq.

Imm. 3. Uumasunut oqartussaqaarfik kinaassutsimik uppersaateqarluni eqqartuussivimmillu piginnaatitsissuteqaratik qaqugukkulluunniit pisortat namminersortullu illuutaannik, iniutaannik, angallataannik allagaataanillu takusaasinnaapput paasissutissanik Inatsisartut inatsisaat una naapertorlugu malittarisassiat tunngavigalugit aalajangiinissanut atugassanik pissarsiniarluni.

Imm. 4. Uumasunut oqartussaqaarfik imm. 3 malillugu inunnut paasissutissanik katersinissaminnut naleqquttutut isigineqartunut piffissami killilikkami piginnaatitsissuteqarsinnaavoq.

§ 25. Kialuunniit qimmeq qitsulluunniit § 11 naapertorlugu illersorneqarsinnaanngitsumik pineqarsoriguniuk tamanna kommunalbestyrelsimut imaluunniit Uumasunut oqartussaqaarfimmut ingerlaannaq nalunaarutigissavaa.

§ 26. Qimmit qitsuilluunniit illersorneqarsinnaanngitsumik pineqarpata akisussaasoq uumasup pineqarnera pillugu kommunalbestyrelsimut iliuuseqarnissamik peqquneqarsinnaavoq.

Imm. 2. Uumasooq napparsimappat iluarsineqarsinnaanngitsumilluunniit ajoqusersimappat kommunalbestyrelsi Uumasunut oqartussaqaarfik isumasioqatigereerlugu uumasup toqunneqarnissaanik peqqusisinnaavoq uumaannassaguni naalliuppallaassappat.

Imm. 3. Peqqussut allaganngorlugu nalunaarutigineqassaaq. Kiisalu peqqussuteqartoqannginnerani uumasumut akisussaasuusoq oqaaseqarnissaminut periarfissaqartitaassaaq.

Imm. 4. Uumasup naalliukkunnaarsinneqarnissaa pissutigalugu imaluunniit akisussaasoq aallarsimasutut naatsorsuutigineqarpat pisariaqarnera naapertorlugu imm. 3 atuutinngiinnarsinnaavoq. Piginnittoq aallarsimasutut isigineqarpat uumasooq allamut naleqquttumut tunniunneqarsinnaavoq imaluunniit toqunneqarsinnaavoq.

Imm. 5. Imm. 2 naapertorlugu toqutsineq uumasup piginnittuanut akiligassanngorlugu aamma taarsiinertaqanngitsumik pissaaq.

§ 27. § 26, imm 1 naapertorlugu peqqussut malinneqanngippat kommunalbestyrelsip imaluunniit Uumasunut oqartussaqaarfiup uumasooq allamut naleqquttumut tunniussinnaavaa uumasorluunniit piginnittumut taarsiinertaqanngitsumik toqutsillugu.

§ 28. Piginnittoq § 26, imm. 1 malillugu peqquneqarsimasooq, imaluunniit § 27 naapertorlugu uumasuutaa toqunneqarsimappat, suliamik eqqartuussivimmut suliassanngortitsisinnaavoq. Aalajangiinerup pineqartumut nalunaarutigineqarneranit ullut 14-it qaangiutsinnagit tamanna pillugu qinnuteqaat politimesterimut saqqummiunneqassaaq. Eqqartuussisunut tunniussineq kinguartitsiffiussanngilaq.

Kapitali 11

Naammagittaalliorneq

§ 29. Kommunalborgestrelsep aalajangiineri Uumasunut oqartussaqaarfimmut naammagittaalliutiginneqarsinnaapput, taamaattoq oqartussat taakku marluk isumasioqatigiillutik aalajangiigaat pinnagit. Aalajangiinerup naammagittaalliutiginneqartup tiguerneranit sap.ak. 4-t ingerlanerini naammagittaalliummik tunniussisoqassaaq.

Kapitali 12

Pineqaatissiissutit pillugit aalajangersakkat

§ 30. § 7-imi, §§ 11-13-imi, § 14-imi, imm. 1-imi aamma 2-mi peqqusummik unioqqutitsinerit Kalaallit Nunaanni Pinerluttulerineq pillugu Inatsimmi malittarisassat naapertorlugit akiliisitsinikkut pineqaatissiinermik kinguneqartinneqarsinnaapput.

Imm. 2. § 11-imi, imm. 1-imi, § 12-imi, imm. 1-imi aamma 2-mi kiisalu § 13-imi, imm. 1-imi aamma 2-mi aalajangersakkanik annertuumik arlaleriarluniluunniit unioqqutitsinerit, uumasuuteqarsinnaaneq uumasuutinilluunniit sammisaqarsinnaaneq suugaluartorluunniit inerteqqutinngorlugu eqqartuussisoqarsinnaavoq.

Imm. 3. § 9-mi, imm. 1 naapertorlugu aalajangersakkanik annertuumik arlaleriarluniluunniit unioqqutitsinerit, uumasuuteqarsinnaaneq uumasuutinilluunniit sammisaqarsinnaaneq suugaluartorluunniit inerteqqutinngorlugu eqqartuussisoqarsinnaavoq.

Imm. 4. Imm. 2 aamma 3 naapertorlugit uumasuuteqarnissamut imaluunniit uumasuutiniq suliaqarnissamut inerteqqummik eqqartuunneqarneq qaqugumulluunniit atuuttussanngorlugu imaluunniit sivikinnerpaamik ukiumik 1-imik sivilissusilerlugu pisinnaavoq.

Imm. 5. Imm. 1-4 malillugit suliat siullertut qullersamut Kalaallit Nunaanni Eqqartuussivimmut suliaassanngortinneqassapput.

Imm. 6. Akiliisitsinerit imm. 1-4 malillugit aalajangersarneqarsimasut Nunatta Karsianut pisassanngortinneqassapput.

Imm. 7. Najoqqutassanut Inatsisartut inatsisaat manna naapertorlugu suliarineqartunut Kalaallit Nunaannut Pinerluttulerinermik Inatsit malillugu pineqaatissiinerit aalajangersarneqarsinnaapput.

Kapitali 13

Atuutilerfia il.il.

§ 31. Inatsisartut inatsisaat ulloq 1. juli 2022-mi atuutilissaaq.

Imm. 2. Ilutigittillugu Qimmit qimuttut kiisalu qimmeqarneq qitsuuteqarnerlu pillugit Inatsisartut inatsisaat nr. 18, 30. oktober 1998-imeersoq, aamma Kommunit qimmit qitsuillu pillugit ileqqoreqqusaat pillugit Namminersornerullutik Oqartussat nalunaarutaat nr. 15, ulloq 19. juni 2003-meersoq, Qimmit qimuttut kiisalu qimmeqarneq qitsuuteqarnerlu pillugit Inatsisartut inatsisaat nr. 18, 30. oktober 1998-imeersoq § 13-imi, imm. 2 naapertorlugu suliarineqartoq, atorunnaarsinneqarpoq.

Imm. 3. Kommunit qimminut qitsunnullu maleruaqqusaat atuutiinnassapput qimminut qitsunnullu maleruaqqusanik nutaanik taarsermissaasa tungaannut.

Naalakkersuisut Siulittaasuat